

**一、比賽的規則：**


競賽員佇上臺進前 30 分鐘，當場抽一張圖稿題目。上臺的時就所抽著的圖稿題目來演說，演說的時間是 2~3 分鐘。演講煞，由評判委員就伊演說的內容參競賽員對話 2 分鐘，照競賽員回答的情形來評分。

**二、評分的標準：**

(1)整體表現；(2)表達流暢；(3)深具創意；(4)從容自信；(5)生動自然

**三、比賽的題型：**

舉例：請共下面這四格的圖，照順序組成完整的描述。(會當盡量發揮，毋過四格攏愛講著)



(圖片來源：網路)

**【第一部分：看圖演說】2~3 分鐘**

各位評判老師、各位小朋友，逐家好(行禮)，我是編號第〇號，我抽著第〇號圖，今仔日我欲共逐家講的題目是「糊塗的囡仔」。

阿文是一個慢性閑糊塗的囡仔，阿母定定叫伊動作愛較緊咧，做代誌愛較頂真的。有一工，伊暗頓食飽，身軀洗了以後，去房間寫功課。這日，老師派的功課並無濟，毋過，伊實在足勢趨的，那寫那迫，連鞭要手機仔，連鞭看尪仔冊，連鞭提彩色筆出來畫，連鞭提四秀仔出來食。就按呢一直拖拖沙沙，等到暗時九點，才發現功課猶袂寫了。「啊！害溜溜矣。」伊開始煩惱，煩惱甲面憂面結，趕緊共功課提出來寫，一直寫到三更半暝才完成。人講：「日時走拋拋，暗時點燈聳。」就是按呢。寫了以後，伊趕緊共簿仔、鉛筆箇倆明仔載愛紮的物件，攏圓入去冊包內，準備去睏囉！因為前一工傷晏，隔工，竟然無聽著亂鐘仔咧叫，煞睏過頭矣。伊凶凶狂狂趕到學校，老師已經開始上課啊！只好躡蹠尾行入去。這節課是算術，老師叫逐家共計算機提出來，伊就拍開家己的冊包，欲揣計算機，毋過，反足久攏揣無，干焦揣著轉冷氣的遙控器。伊感覺家己實在真糊塗，只好共老師講：「老師，我目睭花花，匏仔看做菜瓜，紮毋對物件矣，實在真歹勢。」老師叫伊後擺愛較注意的，毋通閑糊里糊塗過日子。阿文應講：「我知影啦！多謝老師。」

我今仔日就講到遮，多謝逐家。

**【第二部分：評審提問】2 分鐘**

問題（一）：阿文為啥物會紮毋著物件？

回答：因為伊前一工功課寫甲傷晏，款冊包的時，目睭花花無注意，共遙控器看做計算機收入去冊包內，所以才會紮毋著物件。

問題（二）：你想欲予阿文啥物建議？

回答：我想欲建議阿文，轉來厝愛先寫功課，而且，寫功課一定愛專心，緊寫寫咧才通迫，毋通遐爾勢趨。款冊包的時，嘛愛斟酌看，較細膩的，上好檢查幾擺，才袂紮毋著物件，予老師責備。

問題（三）：你敢有紮毋著物件的經驗？

回答：我有紮毋著物件的經驗。會記得頂禮拜的時陣，我共國語課本紮成臺語課本矣，實在真害。

**四、準備的撇步：**

(一)先觀察所有的圖片，心內想一个大概的故事，並訂一个主題。

(二)共圖內底的人物號名，親像：阿明、阿美等，嘛會當用「我」來講這個故事。

(三)共故事寫落來，寫了家己講一遍，看時間有夠無。加練（改）幾遍，表現會較好。

(四)比賽會當看稿，毋過，愛提你抽著的圖題上臺，所以，共稿寫佇你抽著的圖題頂面。

(五)上臺愛報號碼、抽著第幾張圖、向評審問好，講了嘛愛說多謝，注意禮貌。

(六)評審問你問題的時陣，愛盡量講。

五、正式比賽題目如下，攏總八條（由選手當場抽一條）：

**【第 1 題】**



**【第 2 題】**



**【第 3 題】**



**【第 4 題】**



**【第 5 題】**




**【第 6 題】**



**【第 7 題】**



**【第 8 題】**



（圖片來源：網路）